



Broj: 01/1-02-222/16
Ilijaš, 28.01.2016. godine

Z A P I S N I K

sa 37. (tridesetsedme) sjednice Općinskog vijeća Ilijaš, održane dana 28.01.2016. godine, sa početkom u 10h.

Tridesetsedmom sjednicom OV-a Ilijaš predsjedavao je zamjenik predsjedavajućeg Općinskog vijeća Ilijaš g-din Mahir Dević do 12.tačke dnevnog reda, a 13., 14. i 15. tačkom je predsjedavao predsjedavajući g-din Damir Filipović.

Prisutni vijećnici:

RB.	IME I PREZIME
SDA	
1	MAHIR DEVIĆ
2	NEDŽMIJA MATORUGA
3	SAUDIN DURMIĆ
4	-
5	MUAMERA MASNOPITA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
SDP	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
SBB	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
SAMOSTALNI VIJEĆNICI	
18	EDHEM HASANOVIĆ
19	ASIM MUJIĆ
20	NIHAD BUČUK
21	ENES DIZDAREVIĆ
STRANKA ZA SREDNJE	
22	BESIM GLJIVA
23	AIDA MALIŠEVIĆ

	LDS
24	NIJAZ RASTODER
	BPS
25	MUHAMED HANDŽIĆ

Odsutni vijećnik:

1. Halid Dizdarević

Prisutni gosti:

1. Nermina Durić-Kahvedžić - Radio Ilijaš
2. Meho Tabaković – predsjednik Savjeta MZ Ljubina
3. Mirsad Hamzić – predsjednik Savjeta MZ Malešići
4. Mehmed Smajlović – predsjednik Savjeta MZ Mrakovo
5. Alen Matoruga – predsjednik Savjeta MZ Misoča
6. Denis Dilberović – predsjednik Savjeta MZ Dragoradi
7. Almir Špiodić – predsjednik Savjeta MZ Podlugovi
8. RTV Vogošća
9. Samir Fazlić – direktor Uprave za šumarstvo Kantona Sarajevo
10. Nermin Demirović – direktor JP “Sarajevo-šume”

Ostali prisutni:

1. Nijaz Spahić – pomoćnik načelnika
2. Sanja Zagorac-Jozić – pomoćnik načelnika
3. Ilda Kahriman – sekretar OV-a Ilijaš
4. Adha Masnopita – stručni saradnik u Službi za društvene djelatnosti
5. Merima Osmanović – pomoćnik načelnika
6. Alma Imamović – pomoćnik načelnika
7. Meliha Avdibegović – pomoćnik načelnika
8. Sadeta Brkić – pomoćnik načelnika
9. Vahid Hadžiabdić – građevinski inspektor
10. Aida Čutura-Marić – stručni saradnik u Stručnoj službi OV-a i općinskog načelnika
11. Midhat Čeho – koordinator za rad sa mjesnim zajednicama
12. Maida Habibović – zapisničar.

Prije nego što je otvorio sjednicu, zamjenik predsjedavajućeg Mahir Dević je kazao da je Nedžmiji Matoruga dodijeljen mandat vijećnika od strane Centralne izborne komisije BiH, te je pozvao da položi svečanu zakletvu što je i učinila.

Zatim je zamjenik predsjedavajućeg otvorio sjednicu i konstatovao da postoji kvorum za odlučivanje.

Prije utvrđivanja dnevnog reda, dao je na razmatranje zapisnik sa 36. sjednice Općinskog vijeća Ilijaš.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 36. sjednice.

Zatim je konstatovao da je predlagač povukao 9. tačku predloženog dnevnog reda:”Prijedlog Odluke o načinu i uslovima prodaje nepokretnosti (k.č.br.257/61).

Obzorim da prijedloga i primjedbi na dnevni red više nije bilo, Općinsko vijeće Ilijaš je jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključka sa 36. sjednice
3. Prijedlog Odluke o visini bazne cijene za određivanje naknade za uređenje građevinskog zemljišta na području Općine Ilijaš za 2016. godinu
4. Prijedlog Odluke o utvrđivanju prosječne konačne građevinske cijene 1 m² korisne stambene površine u stambenoj izgradnji na području Općine Ilijaš za 2016. godinu
5. Prijedlog Odluke o utvrđivanju raspona cijena za neizgrađeno građevinsko zemljište prema zonama građevinskog zemljišta u Općini Ilijaš za 2016. godinu
6. Prijedlog Odluke o utvrđivanju plana parcelacije građevinskog zemljišta za izgradnju apartmanskog naselja "MAKKA REAL ESTATE" u Mrakovu
7. Prijedlog Odluke o pristupanju izradi Regulacionog plana "Apartmansko naselje Sovrle" – Ilijaš
8. Prijedlog Odluke o davanju saglasnosti na Godišnji plan realizacije šumskoprivredne osnove za ŠGP "Gornjebosansko" za 2016. godinu
9. Prijedlog Odluke o davanju saglasnosti za zaključivanje i potpisivanje Aneksa Ugovora o prodaji (k.č. br.360/2 K.o. Ilijaš Grad – novi premjer)
10. Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-13/15 od 30.12.2015. godine)
11. Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-12/15 od 30.12.2015. godine)
12. Prijedlog Rješenja (izmjena granica između K.o. Ivančići i K.o. Stomorina)
13. Prijedlog Rješenja iz imovinsko-pravne oblasti:
 - a) broj:06/1-31-2871/15
 - b) broj:06/1-31-30/16
14. Prijedlog Mjera za poboljšanje rada mjesnih zajednica Općine Ilijaš
15. Izvještaj o realizaciji Programa rada Općinskog vijeća Ilijaš za 2015. godinu
16. Izvještaj o rješavanju upravnih stvari u upravnom postupku.

AD-1

Vijećnička pitanja i inicijative

ENES DIZDAREVIĆ – samostalni vijećnik

Inicijativa:

1. Pokrećem inicijativu za osvjetljenje ulice na dijelu puta od podvožnjaka za Luku do šehidskog mezarja u Starom Ilijašu.

Obrazloženje: Zbog čestog okupljanja konzumenta nedozvoljenih sredstava i gdje se pješaci na ovom dijelu puta ne osjećaju sigurno, a pogotovo ispod fabrike Megati gdje se isti sastaju.

2. Pokrećem inicijativu za osvjetljenje ulice u naselju Ravne, a koja se nalazi u Podružnici Sovrle i gdje postoje već postavljeni stubovi.

Obrazloženje: Ovu inicijativu pokrećem zbog čestog napada pasa lotalica na djecu i prolaznike. U pomenutom naselju postoje stubovi i električna instalacija, te smatramo da to

Općini Ilijaš ne bi izazvalo velike troškove jer se radi o postavljanju 5 (pet) rasvjetnih tijela.

AIDA MALIŠEVIĆ – vijećnica Stranke za Srednje

Imam jednu primjedbu. Hoću da izrazim nezadovoljstvo odgovorom na moje vijećničko pitanje vezano za održavanje puteva na relaciji Gajevi-Dragoradi, Gajevi-Gajine, koji upotpunosti nije tačan, jer ja sam terenski radnik i svaki dan prolazim tim putem, pa možda ja dobro ne vidim ili me neko stavlja u zabludu. Smatram neozbiljnim ovakav odgovor na činjenično stanje koje sam utvrdila na terenu.

SELMA PUŠINA – vijećnica SDA

Inicijativa:

1. Ponovo upućujem inicijativu nadležnoj općinskoj službi i Kantonalnoj Direkciji za ceste, vezano za postavljanje usporivača saobraćaja pored škola na području Općine Ilijaš, a te škole su: Osnovna škola "Podlugovi" i Područna osnovna škola "Srednje" Kamenica.

ADEM EFENDIĆ – vijećnik SBB-a

Predlažem da se inicijativa vijećnice Selme Pušine pretvori u zaključak.

MUHAMED HANDŽIĆ – vijećnik BPS-Sefer Halilović

U zakletvi kolegice Matoruge se kaže da se trebaju poštivati zakoni, a ja sam dobio jedan odgovor na jedno moje vijećničko pitanje gdje piše da ne trebaju svi poštivati zakone. Naime, radi se o slijedećem. Na prošloj sjednici postavio sam dva pitanja ili jedno pitanje na dvije adrese, a radi se o "KSC i Radio Ilijaš" čiji je odgovor korektan, a druga adresa je JKP "Vodostan" čiji je takođe osnivač Općina Ilijaš, i nisam mogao povjerovati šta piše u odgovoru koji sam dobio. Onaj ko je pisao odgovor na moje pitanje, a tražio sam, između ostalog, i provedbu Zakona o dopunskim pravima boraca, u potpisu je direktorica, glasi da ne podliježe provedbi Zakona o dopunskim pravima boraca. U članu 23. tačka 5. Zakona o dopunskim pravima piše da svi podliježu provedbi ovog Zakona, a posebno firme, javna komunalna preduzeća ili javne ustanove čiji su osnivači općine, kantoni itd. Dakle, i u ovom slučaju se krši zakon i svjedoci smo da se krše zakoni i u javnim ustanovama i preduzećima, pa i kod samih osnivača, ali mi šutimo. Ja ću morati dostaviti imena na nekoj od slijedećih sjednica Vijeća kod tih javnih preduzeća, javnih ustanova, pa i kod osnivača, jer i ovdje ima kršenja Zakona o dopunskim pravima boraca. I u školama ima kršenja ovog Zakona. Znači, oni koji se nisu borili dobili su posao, a oni koji su krv prolijevali za ovu Zemlju neće imati priliku da dobiju posao, niti će njihova djeca imati priliku dobiti posao. Evo vidite i ovakve odgovore dobijamo.

Direktorica i menadžment JKP "Vodostan" Ilijaš neka se sramote ovakvog odgovora na vijećničko pitanje.

NIJAZ RASTODER – vijećnik LDS-a

I ja sam, kao i moji prethodnici, nezadovoljan odgovorima na moja vijećnička pitanja. Dobio sam odgovor od MZ Malešići za pitanje vezano za "EZIO INOX SEMINA" Malešići gdje, ono što su građani MZ Malešići sumnjali, po odgovoru predsjednika Savjeta MZ Malešići je zaista istinito, dok u odgovoru nadležne službe stoji da su to i dalje sumnje. Ja bih volio da načelnik ovo rasvijetli do neke od narednih sjednica Općinskog vijeća Ilijaš i da

se to uredi u skladu sa Ugovorom koji je Općinom Ilijaš potpisala sa nadležnom firmom. Tražim od načelnika da to sprovede onako kako je potpisano Ugovorom ili da se napravi novi Ugovor.

Drugo, kada sam pitao o dekorisanju grada Ilijaša, gospodin Alić Sadik mi je odgovorio da Općinsko vijeće Ilijaš nije donijelo Uredbu o dekorisanju. Ja mislim da Općinsko vijeće ne treba predlagati Uredbe, već to očekujem od nadležne službe, te stoga predlažem:

Inicijativu:

1. Da nadležna općinska služba pripremi Uredbu o dekorisanju i predloži Općinskom vijeću Ilijaš na nekoj od narednih sjednica.

BESIM GLJIVA – vijećnik Stranke za Srednje

Inicijativa:

1. Pokrećem inicijativu da nadležni u Općini Ilijaš sačine kvalitetnu Informaciju o parcelaciji i izgradnji apartmanskih/rezidencijalnih naselja na prostoru Općine Ilijaš.

Obrazloženje:

U posljednje vrijeme na prostoru Općine Ilijaš prisutna je aktivnost parcelacije i izgradnje apartmanskih/rezidencijalnih naselja. Potrebno je analizirati dosadašnje aktivnosti i vidjeti koji su benefiti od ove vrste naselja, a mjesnim samoupravama (mjesnim zajednicama) vratiti benefite ako ih ima kroz poboljšanje putne, komunalne i druge infrastrukture.

2. Predlažem da se zaključkom Općinskog vijeća Ilijaš traži od JP "BH Telecom" da uspostavi signal "Moja TV" na području naselja Donji Čevljanovići, Ivančići i područja Mjesne zajednice Gajevi što građani ovih naselja traže već duže vrijeme. Općina Ilijaš je već izrazila volju da ovaj projekat podrži na način obezbjeđivanja potrebne dokumentacije i saglasnosti koje eventualno budu potrebne za realizaciju ovog projekta.

AKIF BEŠLIJA – vijećnik SBB-a

Pitanje:

1. U kojoj je fazi implementacija vijećničkih pitanja, inicijativa i delegiranja Savjeta mjesnih zajednica Općine Ilijaš u vezi horizontalne i vertikalne signalizacije na lokalnim putevima Općine Ilijaš.

Obrazloženje:

Već dugi niz godina postavlja se pitanje signalizacije na lokalnim putevima Općine Ilijaš, kao i na pružnim prelazima koji svake godine za posljedicu ima enormne štete na navedenoj infrastrukturi, pa čak i ishode sa smrtnim slučajevima. Potrebno je da nadležni najozbiljnije razmotre navedeno pitanje i poduzmu zakonom propisane mjere.

SAUDIN DURMIĆ – vijećnik SDA

Inicijative:

1. Pokrećem inicijativu da na dionici puta koji prolazi kroz industrijsku zonu Luka, nadležna općinska služba izradi projekat vertikalne signalizacije od pružnog prelaza (restoran Diana-Industrijska zona Luka).

Obrazloženje: Pomenuta dionica puta je nedavno puštena u promet i na istoj nije riješeno pitanje saobraćajne signalizacije. Molim nadležnu službu da pristupe realizaciji ove inicijative u cilju povećanja bezbjednosti saobraćaja i sigurnosti građana.

2. Pokrećem inicijativu prema Petoj Policijskoj upravi Ilijaš da u večernjim satima pojačaju saobraćajnu kontrolu vozila i vozača na sporednim putevima na području Općine Ilijaš, naročito na gradskom području i području Industrijske zone Luka sa akcentom kontrole vozača pod dejstvom alkohola.

MAHIR DEVIĆ – zamjenik predsjedavajućeg

Dao je na glasanje prijedlog Adema Efendića da se inicijativa Selme Pušine pretvori u zaključak.

Općinsko vijeće Ilijaš je jednoglasno donijelo slijedeći

ZAKLJUČAK

Traži se od Službe za prostorno uređenje i stambeno-komunalne poslove Općine Ilijaš i Direkcije za puteve Kantona Sarajevo, da postavi “usporivače” brzine ispred osnovnih škola na području općine Ilijaš i to JU OŠ “Podlugovi” i JU OŠ “Srednje” Područna škola Kamenica.

Zatim je zamjenik predsjedavajućeg dao na glasanje prijedlog zaključka Besima Gljive.

Općinsko vijeće Ilijaš je jednoglasno donijelo slijedeći

ZAKLJUČAK

Traži se od BH TELECOM-a da omogući priključenje “Moja TV” na području naselja Donji Čevljanovići, Ivančići i MZ Gajevi – Općina Ilijaš.

AD-2

Izveštaj o realizaciji zaključka sa 36. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključka sa 36. sjednice

AD-3

Prijedlog Odluke o visini bazne cijene za određivanje naknade za uređenje građevinskog zemljišta na području Općine Ilijaš za 2016. godinu

Diskutanata po ovoj tački dnevnog reda nije bilo, pa je OV-e jednoglasno usvojilo

Odluku o visini bazne cijene za određivanje naknade za uređenje građevinskog zemljišta na području Općine Ilijaš za 2016. godinu

AD-4

Prijedlog Odluke o utvrđivanju prosječne konačne građevinske cijene 1 m² korisne stambene površine u stambenoj izgradnji na području Općine Ilijaš za 2016. godinu

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Ovo su Odluke koje se, shodno Zakonu o građevinskom zemljištu, donose do 31. januara tekuće godine za tekuću godinu. Ovo su vanbudžetska sredstva i za ove naknade koje se naplaćuju otvoren je poseban račun i ta sredstva isključivo se koriste za uređenje građevinskog zemljišta, odnosno za izgradnju infrastrukture.

Služba za prostorno uređenje i stambeno-komunalne poslove je predložila da prosječna konačna građevinska cijena 1 m² korisne stambene površine u stambenoj izgradnji na području Općine Ilijaš u 2015. godini iznosi 800,00 KM, odnosno da se, uz malo umanjeње, zadrži na nivou iz 2015. godine, obzirom da u prethodnoj godini nije bilo neke značajnije stambene gradnje na području općine koja bi uticala na izmjenu cijene korisne stambene površine, a i činjenicu da je Odlukom o građevinskom zemljištu utvrđeno šest zona građevinskog zemljišta i svako povećanje cijene znatno povećava naknadu za pogodnost građevinskog zemljišta, što svakako u ovom periodu nije realno vrijeme da se naknada da pogodnost građevinskog zemljišta povećava. Cijena je utvrđena na osnovu podataka koje je Služba pribavila od strane Općinske komisije za utvrđivanje prometne vrijednosti nepokretnosti prava, prema kojima prosječna cijena 1m² stambenog prostora na području općine za period 2015. godinu, u prosjeku, iznosi od 800-1.450,00KM i podataka firme "Fazum-gradnja" d.o.o. Ilijaš koja je dostavila prosječnu cijenu 1m² stambenog prostora za 2015. godinu sa uračunatim PDV-om u iznosu od 1.540,00KM. Za realizaciju ove Odluke nije potrebno planirati sredstva budžetom općine Ilijaš.

NIJAZ RASTODER – vijećnik LDS-a

Građane posebno interesuje šta je to, konkretno, uređenje zemljišta? Da li se tu ubraja samo asfalt-put koji postoji pored objekta ili se tu još nešto uređuje? Ako ljudi sami sebi urade oko kuće, imaju građevinsku dozvolu i urade dvorište, ako sami urade kanalizaciju, ako plate prokope itd. Znači, šta konkretno znači uređenje zemljišta?

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Kada je u pitanju pogodnost koja se plaća u postupku dobivanja građevinske dozvole, plaća se naknada za pogodnost građevinskog zemljišta i plaća se naknada za uređenje građevinskog zemljišta.

Naknada za pogodnost građevinskog zemljišta je fiksna i navedena je u ovoj Odluci.

Naknada za pogodnost je pogodnost lokacije (blizina grada, blizina određenih društvenih sadržaja...). Ako se gradi objekat u centru i to je urbani dio i nije ista pogodnost kao u VI zoni.

BESIM GLJIVA – vijećnik Stranke za Srednje

Imamo područja na Općini Ilijaš gdje bi se VI zona i smanjila gdje su, isključivo građani gradili, puteve, vodovodnu mrežu, pristupne puteve i jedino elektro-infrastrukturu nisu.

Vrlo je mala površina građevinske zemlje na gornjem području općine. Po kom osnovu mi

sada naplaćujemo tim ljudima?

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Za svaku lokaciju se utvrđuju posebno parametri. Za sve što imamo dokaze ili mi znamo da su to građeni uradili i sufinansirali sigurno ne ulazi u uređenje.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o utvrđivanju prosječne konačne građevinske cijene 1 m² korisne stambene površine u stambenoj izgradnji na području Općine Ilijaš za 2016. godinu

AD-5

Prijedlog Odluke o utvrđivanju raspona cijena za neizgrađeno građevinsko zemljište prema zonama građevinskog zemljišta u Općini Ilijaš za 2016. godinu

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o utvrđivanju raspona cijena za neizgrađeno građevinsko zemljište prema zonama građevinskog zemljišta u Općini Ilijaš za 2016. godinu

AD-6

Prijedlog Odluke o utvrđivanju plana parcelacije građevinskog zemljišta za izgradnju apartmanskog naselja "MAKKA REAL ESTATE" u Mrakovu

MAHIR DEVIĆ – zamjenik predsjedavajućeg

Ono što je kolega Besim predložio je dobro i da možda na nekoj od narednih sjednica OV-a imamo tematsku tačku i razgovarati o ovome i da Kolegij OV-a Ilijaš sebi uzme u obavezu da na dnevni reje tada to malo dublje razmotrimo.

Rasprava po ovoj tački dnevnog reda sada bi bila parcijalna.

ADEM EFENDIĆ – vijećnik SBB-a

Što se tiče apartmanskih naselja, odnosno parcelacije ili izrade nacрта Regulacionih planova KV SBB-a je bio protiv, a evo i zašto. Zbog razloga koje je i Besim naveo, zbog nedovoljnih informacija ko radi, zbog čega, kome i koja je krajnja korist Općine Ilijaš. Voljeli bi da ranije saznamo sve ovo, pa bi možda i mi podržavali ovakve projekte. Dodatni razlog što ne mogu da podržim ovo je, što sam prije par godina predlagao izmjenu Regulacionog plana Ljubnići, a šefica nadležne službe mi je odgovorila da se ne mogu raditi Regulacioni planovi u selima. Danas donosimo Odluku o izradi Regulacionog plana Sovrle u nekom dijelu gdje nema niti jedne kuće, a ispod te parcele imate oko 100 kuća i to su apartmani, ali danas moraju za te objekte putem legalizacije mnogo više plaćati.

MAHIR DEVIĆ – zamjenik predsjedavajućeg

Pravo ljudi je da kupe zemlju, pravo ljudi je da grade da planiraju izgradnju na toj parceli, da plate Općini Ilijaš ono što su dužni plate i naravno pravo nas je da budemo informisani o svemu tome šta se dešava.

Slažete li se sa prijedlogom da Kolegij OV-a na jednoj od narednih sjednica na dnevni red predloži Informaciju o dosadašnjim aktivnostima na izgradnji apartmanskih naselja na području Općine Ilijaš i da razgovaramo da sada ovo ne bi parcelisali.

Zamoliti ću predlagača da obrazloži ovu tačku vezano za apartmansko naselje u Mrakovu.

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Drago mi je što tražite informaciju o apartmanskim naseljima i predlagala sam načelniku da donesemo jedan stav što se tiče Vijeća da li podržati ili ne podržati, ali mi ne možemo da ne podržimo ovo što je govorio predsjedavajući. Niko nije zabranio da se to kupi. Kada je već kupljeno, prometovano, podnosi se zahtjev za izgradnju naselja. Niti jedno naselje, niti jedna urbanistička, niti jedna dozvola još nije data što nije bila na Vijeću ili plan parcelacije ili Regulacioni plan. To je stav od početka i mene kao rukovoditelja ove službe i načelnika koji je ovo sve podržao. Prije nego što dođe na Vijeće, provede se Zakonom propisana procedura i zatraži mišljenje nositelja izrade plana Zavoda da kaže je li to plan parcelacije ili je to Regulacioni plan.

Kada je u pitanju dilema da li plan parcelacije ili Regulacioni plan, u svakom slučaju ja podržavam Regulacioni plan, a postoji sukob zakona koji je teško objasniti, ali u Zakonu o prostornom uređenju član 6. definiše režime građenja. To je kada se nalazi u urbanom i van urbanom području, a imamo prostorni plan i urbanistički plan.

U ovom slučaju je zona stanovanja – građevinsko zemljište i iz tih razloga se donosi plan parcelacije, ali je već do sada uradio kompletne projekte na bazi urbanističkog projekta i svi su bili u Zavodu za planiranje i dostavljena su pozitivna mišljenja. Znači, ako je u obuhvatu Urbanističkog plana, a zona građevinskog zemljišta ide plan parcelacije, a ako nije zona stanovanja, a zona je poljoprivrednog zemljišta ide Regulacioni plan i u urbanom dijelu i van urbanom dijelu, odnosno u obuhvatu Prostornog plana. Pošto kod nas Prostorni plan i Urbanistički plan nisu usaglašeni mora se ići na nivo višeg reda, a to je Prostorni plan. Ove godine ističe Urbanistički plan, ali ne možemo pokrenuti proceduru izmjene Urbanističkog plana dok se ne donese Prostorni plan.

SELVER HERIĆ – vijećnik SDP-a

Glavno i suštinsko pitanje je tačka dnevnog reda, ko je vlasnik, odakle dolazi, šta je cilj i šta će se tu raditi. Nas samo to interesuje i ništa drugo. Put kako se dolazi do urbanističke i građevinske dozvole svaki građanin zna, a ako ne zna doći će u nadležnu službu po informacije. Očitujte nam se o vlasniku, o čemu se radi, da li je naš državljanin ili nije, preko koga ide i šta će raditi.

MUHAMED HANDŽIĆ – vijećnik BPS-a

Koliko sam shvatio pomoćnicu načelnika investitor plaća Regulacioni plan, njegovu izradu i pripremu. Iz ovoga proizilazi zaključak ko ima sredstva i ko može da gradi tolika apartmanska naselja on može uraditi i Regulacioni plan, a obični građanin koji jedva smogne snage da napravi jedan sprat, ne može platiti ni parcelaciju. Ja sam izvukao takav zaključak, a možda to nije tako.

U Ilijašu imamo apartmanskih naselja koliko hoćete (pola Podlugova je apartmatnsko naselje), ovi koji su došli iz dijaspore napravili su kuće-nebodere, provedu u njima godišnje odmore i odoše. Ovako je i u Malešićima, dio Luke i sva urbanija naselja su, po meni,

apartmanska naselja.

Oni koji to ne mogu, neće dobiti ni dozvole, za njih se neće raditi plan parcelacije, a o Regulacionom planu mogu samo sanjati.

Shvatio sam da se ide od Prostornog plana pa dalje, ali mi obični građani koji živimo u BiH taj nivo nećemo dostići.

MAHIR DEVIĆ – zamjenik predsjedavajućeg

Želim nas samo vratiti na tačku dnevnog reda koja se zove Prijedlog Odluke o utvđivanju plana parcelacije građevinskog zemljišta za izgradnju apartmanskog naselja "MAKKA REAL ESTATE" u Mrakovu. Svu drugu priču ćemo ostaviti za tematsku tačku. To znači, koliko ja razumijem, slijedeće: neki investitor (x, y) je kupio, u ovom slučaju, građevinsko zemljište da pravi određeni broj objekata. Sada nas informišite koji je to broj objekata i šta se planira praviti.

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Za mene ne postoje x, y investitori, ima samo podnosioc zahtjeva koji je ovdje i naveden. O konkretnoj lokaciji, radi se o firmi koja je registrovana u BiH i želi da gradi objekte (26 stambenih objekata) - 26 građevinskih parcele površine 550 m². Osim stambenih objekata tu su i površine za društvene sadržaje, saobraćajne površine i površine koje će se unutar zone koristiti kao rekreativne površine i to su površine koje se po planu vode kao šumsko zemljište na kojima nema izgradnje.

Što se tiče naših građana i izgradnje objekata poslije rata, svi su imali priliku i mogućnost da dobiju odobrenje za građenje i evo sada je bio postupak legalizacije i sutra se zatvara i na sve moguće adrese data je informacija da građani podnesu zahtjev za legalizaciju. Dobili smo manje zahtjeva nego što smo očekivali. Drugo, za sve te objekte služba je svake godine davala po dva-tri puta urbanističke saglasnosti, pa čak i oni investitori koji su imali mogućnost da se preko službe za boračka pitanja oslobode naknade, nisu završili odobrenja za građenje. Znači, jedini smo u Kantonu otvorili tu mogućnost da se odobri izgradnja na poljoprivrednom zemljištu uz mogućnost pretvaranja poljoprivrednog u građevinsko zemljište.

SAUDIN DURMIĆ – vijećnik SDA

Ja, kao vijećnik i građanin legalista sam, i u ovoj državi postoje institucije koje će provjeriti ko su investitori i ja ovo za Općinu Ilijaš vidim kao šansu. Slažem se sa kolegama da treba jednu tačku dnevnog reda posvestiti apartmanskim naseljima. Molim nadležnu službu, da u zakonskim mogućnostima, ispita mogućnost donošenja posebnih tarifa kada je u pitanju izgradnja apartmanskih naselje, znači da imamo posebne cjenovnike za ovu vrstu gradnje.

NIJAZ RASTODER – vijećnik LDS-a

Ja, kao liberal, kažem da je privatna svojina neprikosnovena čija god bila. Ranije sam bio u zabludi, ali ako neko želi da uloži i ako je sve u okviru Zakona, onda neka se grade ova naselja i da ih hoće biti još više. Ja ću podržati svaku ovakvu Odluku.

MEHMED SMAJLOVIĆ – predsjednik Savjeta MZ Mrakovo

Dolazim iz sredine gdje smo pokrenuli pilot projekat izgradnje ovih apartmanskih naselja. Volio bih da sva naselja na Općini Ilijaš budu u svrsi turizma. Isto tako predlažem da budemo oprezni u određenim stvarima kada je u pitanju infrastruktura koja je putem budžeta ulagana u naša područja. Na Savjetu MZ-e Mrakovo smo pokretili pitanje izrade Regulacionog plana Mrakovo i zamjeram nadležnoj službi što nije u preambuli kazala da smo i mi zainteresovani, a ne samo firme, da se stvari uređuju planski i zakonito. Imamo naučene lekcije kada je u pitanju apartmansko naselje Popovići. Poznat je investitor i izvođač, a trenutna šteta na putu Ilijaš-Popovići je 200.000 KM i ona će još biti veća. Nemamo horizontalne i vertikalne signalizacije, a ima i niz drugih pitanja koja treba raspraviti na nivou Klegija i nivou tematske sjednice i nivou nas predstavnika mjesnih zajednica, policije, zakona i da vidimo ko šta radi. Ne želim da "dolijevam ulje na vatru", ali predlažem hitan sastanak sa investitorom, izvođačem radova i predstavnicima lokalne zajednice da ova pitanja definišemo kada je u pitanju odnos. Činjenica je da su zone definisane i one će biti i skuplje, ali nije sve u novcu. Ovdje je u pitanju transparentnost, korist i šta će to biti sutra. Ja se zalažem da društveni sadržaji (šetnice, sportski sadržaji, bazeni, ...) budu za sve građane.

Znači, predlažem što prije tematsku sjednicu i informaciju, sastanak načelnika sa predstavnicima kojih se tiče.

MELIHA AVDIBEGOVIĆ – pomoćnica načelnika za prostorno uređenje i stambeno-komunalne poslove

Prije nego što smo počeli izgradnju apartmanskog naselja u Mrakovo održan je sastanak u sastavu: izvođač radova, investitor, općina i Direkcija za ceste Kantona Sarajevo. Napravljen je zapisnik koji posjedujemo mi i napravljen je video snimak. Po završetku naselja, bili smo na terenu, Direkcija za ceste je snimila postojeće stanje ceste i dala je nalog izvođaču radova da napravi predmjer i predračun radova. Ne znam da li je šteta na ovoj cesti 200.000 KM, ali bez obzira na to, održat će se sastanak i ti radovi će se izvršiti. Na svim tim naseljima će se tako postupati prema infrastrukturi.

RASIM ŠEHIĆ – vijećnik SDA

Nakon dužih diskusija, izgleda da je sve jasno, a kao od početka nam nije bilo jasno. Kada je predlagač objasnio procedure, sve nam je bilo jasno, a onda smo htjeli ime koje ovdje čitko piše. Čuo sam neke komentare "arapi" i mi kao da smo neki "islamofobi". Svjestan sam da smo kao nacija koja nema politički kontinuitet i nama iskustva i svijest da dobiva investitore i u svemu nešto tražimo način da opstruišemo. Predložio bih da se ugledamo na susjede koji dovode investitore i ulažu milijarde u centru Beograda, a mi ovdje dižemo nepotrebno "halabuku" i stvarno mi nije jasno.

Diskutanata po ovoj tački dnevnog reda više nije bilo, pa je OV-e pristupilo glasanju, ali je vijećnik Selver Herić izrazio sumnju u glasanje i zatražio pojedinačno glasanje.

ZA su glasali slijedeći vijećnici: Mahir Dević, Nedžmija Matoruga, Saudin Durmić, Muamera Masnopita, Muamer Dervišević, Fahir Hasanović, Rasim Šehić, Selma Pušina, Edhem Hasanović, Asim Mujić, Besim Gljiva, Aida Mališević, Nijaz Rastoder, Nihad Bučuk, Muhamed Handžić i Enes Dizdarević.

PROTIV su glasali slijedeći vijećnici: Adem Efendić, Nijaz Mašić, Sead Šehić i Akif Bešlija

UZDRŽANI su bili slijedeći vijećnici: Marioneta Ilić-Jureta, Selver Herić

Odsutni vijećnici: Alan Šerak, Halid Dizdarević i Damir Filipović

Konstatovano je da je Općinsko vijeće Ilijaš sa 16 glasova ZA, 4 PROTIV i 2 UZDRŽANA donijelo

Odluku o utvđivanju plana parcelacije građevinskog zemljišta za izgradnju apartmanskog naselja "MAKKA REAL ESTATE" u Mrakovu

AD-7

Prijedlog Odluke o pristupanju izradi Regulacionog plana "Apartmansko naselje Sovrle" – Ilijaš

Diskutanata po ovoj tački dnevnog reda nije bilo, pa je Općinsko vijeće Ilijaš sa 16 glasova ZA, 4 PROTIV i 2 UZDRŽANA donijelo

Odluku o pristupanju izradi Regulacionog plana "Apartmansko naselje Sovrle" – Ilijaš

AD-8

Prijedlog Odluke o davanju saglasnosti na Godišnji plan realizacije šumskoprivredne osnove za ŠGP "Gornjebosansko" za 2016. godinu

MAHIR DEVIĆ – zamjenik predsjedavajućeg

Želim vas informisati da sam juče prisustvovao sastanku na kome su bili ministar privrede Kantona Sarajevo, premijer Kantona Sarajevo, ministar finansija, a vezano za sredstva od OKFS i tražili smo da se napravi značajan iskorak, a u vezi mnogih inicijativa koje su pokrenute na ovom Vijeću, a opravdane su, u smislu da su putevi na šumskom području, odnosno području gdje se eksploatiše šuma na gornjem području Općine Ilijaš devastirani. Ono što je bila informacija na tom sastanku je da bi razgraničena sredstva za ovu namjenu bila cca 7 miliona KM uključujući i sredstva koja nisu realizovana u 2015. i 2016. godini. Ja, općinski načelnik, direktor Sarajevo-šuma i direktor Uprave za šumarstvo tražili smo od ministra da se usvoji princip da po procentu eksploatacije se vraća u izgradnju putne infrastrukture. Npr. ako će od 7 miliona biti 3-4 miliona za puteve, a ako se u Ilijašu siječe 50% drveta, onda da 50% tih sredstava se vrati na područje MZ Gajevi, Dragoradi, Kamenica, Srednje i da se investira u putnu infrastrukturu. Mislim da postoji potpuno razumijevanje i od strane ministra privrede, premijera, direktora Sarajevo-šuma i direktora Uprave za šumarstvo. Ja zaista očekujem da u 2016. godini, nakon dugog niza godina nerazumijevanja, ovo pitanje počnemo pozitivno rješavati. Zamolit ću Službu za privredu, finansije i investicije da napravi analiza zadnjih 10 godina koliko je sredstava od OKFS uloženo u te puteve, a koliko je eksploatisano šume, pa da po tom osnovu se, kao Vijeće, možemo donijeti zaključke i proslijediti kako bi smo dobili što više sredstava za modernizaciju ovih puteva.

Predlažem Općinskom vijeću da izvrši dodatni pritisak i na premijera, ministra privrede i finansija i sve druge da povučemo ova sredstva i da se ovo realizira.

NERMIN DEMIROVIĆ – direktor JP "Sarajevo-šume"

JP Sarajevo-šume svake godine prave plan gospodarenja šumama, a osim njega pravi se plan poslovanja za tekuću godinu. Ovo što imate u materijalu radi se isključivo o šumarskom dijelu, odnosno planu gospodarenja. Pokušat ću vam iznijeti šta smo zamislili kroz plan poslovanja koji nije dorečen.

Plan gospodarenja je izvor jednogodišnjeg plana iz šumsko-gospodarske osnove koju ste imali priliku usvojiti prošle godine i on je u skladu sa desetogodišnjim planom tj. Sa ŠGO, a ono što je bitno je da se svi zahvati, uglavnom, nalaze u dozvoljenim granicama korištenja. Ta cifra je cca 48.000 m³ za četinare i lišćara cca 6000 m².

U sklopu plana gospodarenja nalaze se i aktivnosti koje će se provesti na šumsko uzornim radovima i zaštiti šuma. Za 2016. godinu planirali smo cca 350.000 KM uložiti za te aktivnosti. Pored ovih aktivnosti, u planu poslovanja, kada govorimo o investicionim ulaganjima u ostale investicije (rekonstrukcija postojećih objekata i infrastrukture), planirano je cca 380.000 KM za 2016. godinu, dok je za tekuće održavanje šumskih komunikacija planirano je cca 50-80.000 KM. Planirano je cca 250.000 KM za ostala ulaganja (oprema i sredstva) koji treba da se implementiraju za Šumsku upravu Srednje. Takođe, ono što smo napomenuli, najznačajnije u ovom dijelu što će se implementirati do 30.06.2016. godine je asfaltiranje dijela puta Udrabi-Gajine gdje je vrijednost ukupog projekta cca 200.000 KM. Ovdje učestvuje Ministarstvo privrede Kantona Sarajevo, Sarajevo-šume i Općina Ilijaš. Sa općinom je potpisan sporazum oko tog finansiranja. Provedena je procedura i nadam se da će se ovi radovi završiti do 30.06.2016. godine. U sklopu ovoga, sa Ministarstvom privrede Kantona Sarajevo su potpisani i ostali projekti koji će se implementirati i realizirati putem Sarajevo-šuma, a ukupna vrijednost na području Općine Ilijaš je cca 420.000 KM. Obzirom da smo u proteklom periodu imali pitanja za Sarajevo-šume, jedan od projekata koji se nalazi u ovom planu gospodarenja je nadomak ove zgrade (75-i odjel) koji ima za cilj pošumljavanje koje će se obaviti na proljeće.

Plan gospodarenja je sastavni dio šumsko-gospodarske osnove koja je važeća, usvojena i odobrena i ovaj plan se nalazi u granicama dozvoljenog eteta, odnosno mase koja se može posjeći i realizirati.

SAMIR FAZLIĆ – direktor Uprave za šumarstvo Kantona Sarajevo

Vidjeli ste da postoje projekti koje će Ministarstvo privrede, preko Uprave za šumarstvo, finansirati, a tu još nije upisan put Udrabi-Gajine. Predsjedavajući vam je već naglasio da će ove godine biti uvećana sredstva od OKFS-a. Ono što znam je da vas najviše interesuje putna infrastruktura koja je oštećena, želimo pomoći lokalnoj zajednici da se ti putevi saniraju. Takođe i ostali radovi koji se provode u šumarstvu da se regulišu.

MAHIR DEVIĆ – zamjenik predsjedavajućeg

Mi ćemo se zalagati da ta sredstva za putnu infrastrukturu budu milion KM na području Općine Ilijaš i borit ćemo se za ovu vrstu priče.

NIJAZ RASTODER – vijećnik LDS-a

Ja neću podržati ovaj plan i objasniti ću zbog čega. Kada je u pitanju pošumljavanje, prije par godina sam bio svjedokom tog pošumljavanja. Volio bih da ste donijeli elaborat koja se to šuma podigla koju ste vi pošumili u proteklih deset godina. Gdje je ta šuma? Stotine hiljada maraka su prikazane za pošumljavanje, a od te šume ništa. To meni izgleda kao

"pranje novca". Prema privatnoj šumi se ponašate kao da ste vi vlasnici, a oni čija je šuma robovi, jer da bi neko odsjekao drvo u svojoj privatnoj šumi, treba predati zahtjev koji ide za Mostar, pa čekati tri mjeseca, a šumar se već dogovorio sa šumokradicom iz te tvoje šume odsječe drvo za koje se podnio zahtjev, ono je već nestalo i dok dođe dozvola nemaš šta odsjeći. Nekorektno se ponašate prema privatnoj šumi i nekorektno se ponašate prema ovom dijelu gdje gazdujete, a posebno pošumljavanje (gledao sam kako ljudi po vreću sadnica bacaju) i o tome niko ne vodi računa. Zbog ovoga ne mogu glasati za ovu odluku.

MUHAMED HANDŽIĆ – vijećnik BPS-a

Dok je kolega Rastoder izlagao i govorio da nema pošumljavanja, da šumokradice sve pokradoše, meni su se noge "odsjekle". Postoje nadležnosti i jasno su podijeljene. Pošumljavanja ima i konkretno ću reći da je u Bioči više hektara pošumljeno. Ja želim kazati da me ohrabruje informacija koju je dao zamjenik predsjedavajućeg Mahir Dević. Mislim da smo sada kadrovski najjači, jer imamo našeg direktora Demirovića i direktora Uprave Samira Fazlića i mislim da će nam pomoći. Znači, puteve na gornjem kraju treba stvarno popraviti.

MAHIR DEVIĆ – zamjenik predsjedavajućeg

U jednom momentu trebat će sve političke partije da zauzmu stav od strane OV-a spram ovog pitanja. Ovo je pitanje preduzeća koje gazduje na području Općine Ilijaš.

SELVER HERIĆ – vijećnik SDP-a

Na početku ću iskazat nezadovoljstvo o ovom papiru koji je tabelarno prikazan gdje se mi laici ne možemo snaći. Drugo, izgovorit ću jednu starinsku poslovicu "obećanje, ludom radovanje". Posljednje što su Sarajevo-šume uložile u infrastrukturu bilo je prije 15-ak godina prema Dragoradima i Crnoj Rijeci i to je sve. Za uređenje puteva za koje dobijate informacija su šumski putevi koji koriste Sarajevo-šumama i šumokradicama. Put koji nije od interesa građanima, a prikaže se da je uloženo u taj put, znači samo za dva segmenta je uloženo. Po mom mišljenju slijedeći rat će se voditi zbog voda. Najveći uzrok nestanka vode je sječa šuma. Što rekoste istrajat ćemo da sve što izvezu da na tom području vraćaju, u to smo uvjereni, a dosta puta sam govorio da je to vraćanje minimalno ili nikakvo. U to vraćanje ne vjerujem, a iz slijedećih razloga. Donijeli smo zaključak da se odobri uplata ogrjevnog drveta za građane Ilijaša, vi se oglušite, a od tih građana gdje žive, sa tog područja uzimate 50% šuma, a njima ne dozvolite da uplate i da se griju zimi, nego ih "primorate" da "kradu" šumu.

Oglušili ste se na adaptaciju nekih puteva, oglušili ste se na zaključak OV-a da se omogućiti uplata ogrjevnog drveta građanima Ilijaša i KV SDP-a neće dati saglasnost na Prijedlog Odluke o davanju saglasnosti na Godišnji plan realizacije šumskoprivredne osnove za ŠGP "Gornjebosansko" za 2016. godinu.

MAHIR DEVIĆ – zamjenik predsjedavajućeg

Pridružujem se priči da je ulaganja bilo malo i to uvijek pričam, ali ne možemo reći da 15 godina nije uloženo ništa. Slažem se da nije dovoljno.

BESIM GLJIVA – vijećnik Stranke za Srednje

Moji određeni stavovi po pitanju šuma na gornjem kraju općine se nisu promijenili i nije me još niko uspio ubjediti da je plan sječe šuma adekvatan. Ono što ponavljam cijelo vrijeme, na gornjem području Općine Ilijaš šume nestaje. Ono što mi je drago, iz prethodnih diskusija, drago mi je da smo se razumjeli vezano za puteve na gornjem kraju. Obećana su sredstva od onih koji to mogu i to podržavam.

Ja želim vjerovati da ćemo u skorije vrijeme imati određena ulaganja u ovu infrastrukturu.

MAHIR DEVIĆ – zamjenik predsjedavajućeg

Nije ovdje bilo nikakvih političkih stavova koji su bili različiti, što se tiče mene i kolege Besima. Moje su reakcije na prethodnim sjednicama išle u smislu populizama koje nisam podržavao, a isto mislimo o razvaljivanju puteva i ja i Besim i svi ostali. Samo me čudi da neke kolege koje su jako dugo u politici, prave se da ne znaju na koji način se mogu donijeti ova sredstva u Ilijaš. Bilo je raznih premijera, pa su se pravili igmanski putevi, putevi za Bjelašnicu, Sinanoviće itd.

Svi zajedno treba da radimo na ovome da se ovo popravi i mislim da ćemo to popraviti kao i ovo što smo dogovorili sa Direkcijom za ceste. Najlošiji put u regionu je vjerovato put kroz Malešiće.

SELVER HERIĆ (replika) – vijećnik SDP-a

Znam u kom smjeru ide vaša diskusija i ovaj što je pravio puteve po Igmanu, na vlasti je bio dvije godine, a oni ostali 18 godina. Posljednjih 8 godina na području MZ Srednje nasuto je 3 km puta crvenom rudničkom šljakom i to je jedino ulaganja u ovoj mjesnoj zajednici. Ako je to dobro, onda podržavam ovu Odluku.

Dalje, znam kako idu sredstva, ali ih moramo primorati da nam ta sredstva vrate, a primorat ih možemo jedino ako izađemo na put i ne damo im izvoziti naše šume. Evo primoravamo ih 20 godina i ne možemo ništa da uradimo.

Čudim se kolegama, koji su promjenljivog karaktera, pričamo čitavu godinu i onda dođete i podržavate nešto. Ako su Sarajevo-šume zaslužile sa svojim ulaganjem u našu općinu da im podržimo ovu Odluku i damo svoj glas, onda "svaka čast".

MAHIR DEVIĆ (replika) – zamjenik predsjedavajućeg

Ne bih volio da ovo pretvorimo u odgovornost politika. Ja tvrdim da su sve politike spram ovog pitanja prilično se isto ponašale. Sada ima naznaka da će aktuelni ministar, aktuelni premijer i aktuelni ljudi na višim nivoima vlasti ovo promijeniti. Imamo obećanje. Maloprije sam rekao šta je dogovoreno sa Direkcijom za ceste i to nije stvar politika. Svi su se tako odnosili prema ovom pitanju i nije ova aktuelna vlast bila 20 godina, bilo je premijera iz svih političkih partija. Kao što su svi "ravnali" Gras tako su "ravnali" i Ilijaš kad su u pitanju Sarajevo-šume. Tu stvar trebamo zajedno rješavati. Slažem se upotpunosti, ako ne uspijemo političkom borbom ovo riješiti, i ja sam za da idemo blokirati cestu, ali nisam za to da se blokira rad preduzeća u kojem radi 150 radnika iz Ilijaša.

SEAD ŠEHIĆ – vijećnik SBB-a

Interesuje me koliko je, u procentima, do 1992. godine područje Gornjebosansko bilo pokriveno šumama, a koliko je sada? Da li imate te podatke? Drvna industrija je prije rata

bila razvijenija i mislim da bi sada trebalo biti puno više šume, nego tada.

AKIF BEŠLIJA – vijećnik SBB-a

Ohrabruje me informacija od zamjenika predsjedavajućeg, ali me interesuje da li je to u narednom periodu odakle se bude eksploatisala šuma da će biti vraćeno u određenim procentima, pa će se ti putevi popravljati ili će to biti racionalno podijeljeno na one dijelove gdje je do sada rađeno, a nije vraćano dio sredstava i popravljani putevi.

Drugo pitanje – imamo dosta urađenih puteva, ali na koji nači spriječiti da se ti putevi ne prokopavaju i uništavaju?

NERMIN DEMIROVIĆ – direktor JP "Sarajevo-šume"

Obzirom da je vijećnik Nijaz Rastoder iznio tešku optužbu kako se na račun pošumljavanja vrši "pranje novca", u tom smislu pozivam ga na jednu akciju koja će biti na proljeće i da vidimo šta smo pošumili i kako da se konkretno uvjerite u taj projekat.

Privatne šume nisu u nadležnosti Sarajevo-šuma, a mi gospodarimo šumama u vlasništvu države i odgovorni smo za taj dio kada govorimo u ulaganju.

Što se tiče pitanja vezano za tabelarni prikaz, nije se moglo drugačije, jer su to propisani tabelarni prikazi i na takav način se moraju popuniti, a mi smo tu da pokušamo dati obrazloženja.

Kada su u pitanju ulaganja u posljednjih deset godina, dosta je odgovoreno, ali bilo je ulaganja i možda su dovoljna, ali pokušali smo tim asfaltiranjem riješiti (Homar, Ravne, Gajine).

Kada su u pitanju ostala ulaganja, Sarajevo-šume imaju sporazum sa Općinom Ilijaš o plaćanju osnovnih naknada za korištenje šuma, ali bilo je kašnjenja, ali evo sada se tu uredno servisira.

Kada govorimo o nekim blokadama, već je odgovoreno od strane predsjedavajućeg da cca 150 radnika sa područja Općine Ilijaš radi u Sarajevo-šumama.

Pitanje površine Gornjebosansko prije i sada, želim reći da je ono sada podijeljeno na dva dijela zbog administrativnih granica Kantona Sarajevo i ono je definisano na ostalim područjima kao što je područje Visokog, Vareša, djelimično Kaknja, a dio šumsko gospodarskog područja nalazi se i na području Općine Ilijaš i ono trenutno iznosi cca 14.600 ha što govorimo o šumama i šumskom zemljištu. Tačan podatak da li je došlo do povećanja ne mogu sada reći, ali postoji katastar koji se vodi i može se to uporediti i vidjeti.

Što se tiče pribavljanja i trošenja sredstava, sugerisao bih svima da Općinu Ilijaš, kada su u pitanju određeni interesi i interesne grupe Kantona Sarajevo ili ovoga bogatstva, treba posmatrati jedinstveno kao cjelinu i mislio sam da je ovo pitanje vezano za lijevi ili desni krak općine gdje je više realizovano ili nije realizovano kada govorimo o gornjem kraju općine. Moja sugestija je da se općina posmatra kao cjelina i da se na takav način trebaju sredstva koristiti, bez obzira gdje to bilo. Naravno u onom dijelu gdje se najviše koriste, a koriste se sa gornjeg kraja, neće to biti sa donjeg kraja, ali nema to veze i nema "donji ili gornji", tako da se nadam da će to sve biti dobro za narednu godinu.

Diskutanata po ovoj tački dnevnog reda više nije bilo, pa je Općinsko vijeće Ilijaš sa 19 glasova ZA, 1 PROTIV i 3 UZDRŽANA donijelo

Odluku o davanju saglasnosti na Godišnji plan realizacije šumskoprivredne osnove za ŠGP "Gornjebosansko" za 2016. godinu

AD-9

Prijedlog Odluke o davanju saglasnosti za zaključivanje i potpisivanje Aneksa Ugovora o prodaji (k.č. br.360/2 K.o. Ilijaš Grad – novi premjer)

Diskutanata po ovoj tački dnevnog reda nije bilo, pa je Općinsko vijeće Ilijaš jednoglasno donijelo

Odluku o davanju saglasnosti za zaključivanje i potpisivanje Aneksa Ugovora o prodaji (k.č. br.360/2 K.o. Ilijaš Grad – novi premjer)

AD-10

Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-13/15 od 30.12.2015. godine)

MAHIR DEVIĆ – zamjenik predsjedavajućeg

Ovu Odluku i slijedeću smo donijeli na prošloj sjednici Općinskog vijeća, ali je došlo do greške u brojevima parcela i to sada treba ispraviti uz primjedbe Komisije za statut i propise.

Diskutanata po ovoj tački dnevnog reda više nije bilo, pa je Općinsko vijeće, uz primjedbe Komisije za statut i propise, jednoglasno donijelo

Odluku o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-13/15 od 30.12.2015. godine)

AD-11

Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-12/15 od 30.12.2015. godine)

Diskutanata po ovoj tački dnevnog reda nije bilo, pa je Općinsko vijeće, uz primjedbe Komisije za statut i propise, jednoglasno donijelo

Odluku o izmjeni Odluke o neposrednoj pogodbi za prodaju neizgrađenog građevinskog zemljišta (01/1-02-3178-12/15 od 30.12.2015. godine)

AD-12

Prijedlog Rješenja (izmjena granica između K.o. Ivančići i K.o. Stomorina)

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenje (izmjena granica između K.o. Ivančići i K.o. Stomorina)

AD-13

Prijedlog Rješenja iz imovinsko-pravne oblasti:

a) broj:06/1-31-2871/15

b) broj:06/1-31-30/16

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenja iz imovinsko-pravne oblasti

a) broj:06/1-31-2871/15 i

b) broj:06/1-31-30/16

Pauza: 12:00-12:20h

Sjednicu dalje vodi predsjedavajući Općinskog vijeća Damir Filipović.

AD-14

Prijedlog Mjera za poboljšanje rada mjesnih zajednica Općine Ilijaš

MIDHAT ČEHO – koordinator za rad sa mjesnim zajednicama

Sam tekst je prošao proceduru koju usvaja Komisija, Služba, a i načelnik je dao završnu riječ. Prihvatam ovaj prijedlog mjera upotpunosti i ove prve četiri tačke su u toku realizacije. O tački 5 i ostalim tačkama se može diskutirati, a ja sam u tački 7 obzirom na to da sam bio uvjeren da će naknada savjetima mjesnih zajednica biti implementirana i da u budžetu ima prostora za takvo nešto. Ozbiljno smo razmišljali da naknada predsjednicima savjeta bude 300 KM, a 200 KM za kancelarijsko poslovanje i određene troškove koji se pojavljuju.

Savjeti nemaju adekvatne uslove, a mjera za kancelariju je MZ Mrakovo, Melešići i odnedavno kancelarija MZ Ilijaš Stari. Neću se zadražavati na radu kancelarija, ali vrlo bitan je rad organa u mjesnim zajednicama (savjet, zbor građana i mirovno vijeće) i na ovo treba dati viši fokus. Često se dešava da savjet ne funkcioniše kao kolektivni organ u nekim mjesnim zajednicama.

U razvoju lokalnih zajednica ključno mjesto pripada savjetima mjesnih zajednica.

Ja sam zadovoljan odnosom sa svojim saradnicima, a oni u svom obraćanju neka kažu koje su to njihove poteškoće, šta im se ne sviđa u koordinaciji i šta predlažu za poboljšanje.

MEHMED SMAJLOVIĆ – predsjednik Komisije za poslove mjesnih zajednica i saradnju sa drugim općinama i gradovima

Obzirom da smo se izborili za ovu tačku dnevnog reda, a u aprilu je predložena tematska sjednica predlažem da prihvatimo ovaj materijal, a da do tematske sjednice izdefinišemo naše stavove kada je u pitanju odnos načelnika i mjesne zajednica, sam organ koji je popunjen ili nije popunjen, nejasnoće oko transformacije mjesnih zajednica. Na ovoj sjednici je pristupno samo šest predsjednika savjeta, a gdje je ostalih osam? Dakle, još jednom predlažem da usvojite ovaj dokument, a do aprila ćemo vidjeti šta je urađeno ili nije urađeno.

MIRSAD HAMZIĆ – predsjednik savjeta MZ Malešići

Želim reći ono što sam ja primjetio. Kada smo ranije usaglašavali tabele bila je jedna, a sada imamo drugu i mislim da nisu usklađane.

Između ostalog ovdje je navedena edukacija savjeta mjesnih zajednica. Ja mislim da su najvažniji elementarni uslovi za rad, jer šta nam znači edukacija ako nemamo gdje sjediti, ako nemamo inventara, kompjutera itd. Postoje neke mjere koje mi nisu javne i prebačene su u 2017. godinu, a većina vas možda neće biti tada u Vijeću, kome ovo ostavljate u amanet da se to ispoštuje. Traži se izvještaj od nas. Ja sam izvještaj o radu Mjesne zajednice Malešići dostavio u septembru, ali ga niko nije čitao. Da je pročitano, ne bi

vijećnik Nijaz Rastoder postavljao pitanje vezano za EZIO INOX SEMINA – Malešići, jer da je čitao izvještaj vidio bi da je i to navedeno.

Kada je u pitanju ova zadnja tabela, većina predsjednika savjeta nije učestvovala. Potpuno podržavam preporuke koje su ključne stvari i one trebaju biti zaključci. Naše mjesne zajednice nemaju osnovne elementarne uslove za rad. Koordinacije nedostaje, ali ja mogu reći da imam jako dobru saradnju, a nekada se dešava da se i službe samo ogлуše na naše upite.

Materijal za budžet sam dobio na dan sjednice i nisam imao priliku uložiti amandman na vrijeme. Volio bih da materijale za sjednice Vijeća dobivamo na vrijeme.

Bitno je i nama i građanima da mjesna zajednica funkcioniše. Kada su u pitanju neki projekti, niko nas ne obavještava, nismo uključeni.

Ako nam ne treba 14 mjesnih zajednica, neka to bude šest, ali da funkcionišu kako treba.

ALEN MATORUGA – predsjednik MZ Misoča

Želim reći da je vijećnik Muhamed Handžić pokrenuo ovo pitanje oko mjesnih zajednica. Svi smo bazirani na ove preporuke i tu je sve navedeno što se tiče problema u mjesnim zajednicama.

Narod je zadnji sud koji će odlučiti da li radi savjet mjesne zajednice, a ne Vijeće ili neko drugi. Niko ni vama ne sudi ako za četiri godine ne izađete za ovu govornicu i nešto kažete.

MUHAMED HANDŽIĆ – vijećnik BPS-a

Dobili smo prijedlog mjera u drugom obliku, nego u prvom, ali i ovaj je jako dobar ako se krene u njegovu realizaciju. Ako bi upotpunosti ili djelimično realizovali sve ove prijedloge mjera, Općini Ilijaš je potrebno dodatnih 2 miliona KM. Ovi što me ne slušaju, a smiju se – pomoćnici načelnika, a tiče se njih, neka se smiju, a vi predsjednici mjesnih zajednica šaljite zahtjeve i nadam se da ćete imati razumnu podršku vijećnika, jer mi znamo šta znači biti predsjednik savjeta mjesne zajednice i znamo da ste autentični predstavnici naroda Općine Ilijaš.

Ovdje ima jedna tačka koja kaže "Priprema prijedloga o izmjenama Odluke o dodjeli mandata" – lijepo definisana. Svi ovi elementi koje ste predsjedniče Komisije naveli mogli su biti regulisano preko jednog akta koji se zove Statut mjesne zajednice koji nikada nije zaživio i koji se tumači dvosmisleno i kada dođemo pred pravnika u izvršnu vlast, kažu nam nije to ta tačka i primjenjivat ćete ovu koja je slična.

NIJAZ MAŠIĆ – vijećnik SBB-a

Ove preporuke vode ka rješenju ukoliko ima novca. Jasno je svakome, a i boldirano je šta je najteže – finansijska sredstva. Moramo znati da teritorijalno ustrojstvo naše države, mjesne zajednice nemaju subjekat lokalne i teritorijalne jedinice, već su dio onako kako ih hoće tretirati općina. Ne možemo se pozivati i niko ne može donijeti nikakav akt o poništenju izuzev Vijeća i onih organa koji su izabrani u mjesnim zajednicama. Slažemo se da se materijalno opreme i pomognu svi savjeti mjesnih zajednica. Skrenuo bih pažnju – prilikom izbora u mjesnim zajednicama imali smo praktičnih problema biračkih spiskova. Pa ako se odlučimo da općinska izborna komisija provede izbore u mjesnim zajednicama, da se prije sedam dana zaključi birački spisak, ali da stanovništvo ima lične karte u predratnim mjestima, ali živi tu, da ih uvrstimo u taj birački spisak. Takođe i oni koji čekaju da im se izdaju lične karte, da im se omogući glasanje.

Ovo pod tačkom 6. da mjesne zajednice strogo vode računa o sklapanju ugovora – njih sudovi tretiraju kao pravno lice čim stave pečat i imamo problem tako sa Podlugovima i ko zna kada će se to riješiti. Treba razmisliti o mogućnosti da ugovore sklapa mjesna zajednica, da li se može objaviti u Službenim novinama (da nadležna služba razmisli) zaključak da bez parafiranja načelnika općine ili pravobranioca je ne važeći kako bi sudovi mogli pravno djelovati. Dakle, o ovom šestom članu treba razmisliti.

BESIM GLJIVA – vijećnik Stranke za Srednje

Mjesne zajednice su veoma bitan aspekt u našem društvu. Na početku ću pohvaliti rad predsjednika Komisije i rad koordinatora vezano za ovo, a i vijećniku koji je inicirao ovo pitanje. Oni su izvukli maksimum koji su mogli. Zna se da politika određuje sve u jednoj lokalnoj zajednici. Kada je ovo prošlo razna "sita i rešete" ponudilo se nama vijećnicima, ali nije se ponudilo ništa. Ovo je lijepo napisano i formulirano, a suština ovoga je ništa. Ja sam dugo predsjednik savjeta mjesne zajednice i vijećnik i govorim s aspekta iskustva. Želim navesti jedan primjer gdje smo mi kao OV-e donijeli Odluku da onaj ko obavlja funkciju vijećnika ne može obavljati funkciju predsjednika savjeta mjesne zajednice iako ima podršku naroda. Zna se šta se dešava dalje? To lice ostvari određen broj glasova, ubjedljiv, a Odluka ga sprječava da bude predsjednik savjeta i u cijeloj toj kampanji protiv tog lica učestvuje politika. Hoću reći da politika instrumentalizira i kanališe i sve ostalo. Ovaj rad, odnosno ne rad u organu, u posljednjih 15 godina unutar savjeta i unutar organa koji je zadužen sa savjet mjesnih zajednica nismo uradili mnogo štošta. Neću kriviti ni organ. Pomoćnica načelnika sluša šta joj kaže načelnik, a načelnik sluša šta politika kaže. To vam je tako. Čemu tematska sjednica ako će biti kao i ovo.

Kada se tiče rada pomoćnika, iz mog dugogodišnjeg iskustva, oni daju maksimum koji je u njihovim okvirima i često nemamo razumijevanja.

Ja predlažem za april da se poradi i da to bude broj jedan na reorganizaciji mjesnih zajednica. Bez reorganizacije mjesne zajednice ćemo i dalje biti "uspavani". Moramo izvršiti reorganizaciju, ali moramo se dogovoriti zajedno, mi kao politika. Znači, ukрупniti mjesne zajednice, profesionalizirati i uposeliti kadrove, dati im plate, dati zadatke i završiti više jednom farsu sa mjesnim zajednicama. Sve drugo je gubljenje vremena.

SAUDIN DURMIĆ – vijećnik SDA

Ne bih se složio sa pojedinim predsjednicima mjesnih zajednica vezano za vijećnike, jer ima nekih koji su vijećnici po 15 godina i nisu nikada pokrenuli pitanje rada savjeta mjesnih zajednica. Kao što je i profesor govorio, ja se neću složiti da vi predsjednici mjesnih zajednica raspolazete pečatima. Što se tiče poruke o naknadama, mislim da je to poruka građanima kakve predsjednike trebaju birati. Dobro je vijećnik Handžić govorio da je to bila utrka za predsjednike savjeta mjesnih zajednica, a ne za savjete. Mnogi koji su izabrani u savjet, a nisu izabrani za predsjednika, nikada nisu ni došli na konstituisanje savjeta mjesne zajednice.

Sa ovim prijedlogom mjera, mislim da smo napravili jedan iskorak uz puno uvažavanje ljudi koji su radili na ovome. Imat ćemo u aprilu sjednicu i razmatrat ćemo rad savjeta i ko nam brani da i tada donesemo prijedlog mjera. Niko nije protiv toga da se stvore kvalitetni uslovi za rad savjeta mjesnih zajednica.

KV SDA je razmatrao ovaj prijedlog mjera i podržat će ga i pratit ćemo rad savjeta mjesnih zajednica.

RASIM ŠEHIĆ – vijećnik SDA

Slušajući sve diskusije do sada, ja stičem utisak kao da nije bila ni najbolja koordinacija. Ono što mislim da je ključno u svemu ovome, poštovana gospodo, ne možete uzimati u istom kontekstu sve mjesne zajednice. Mora se uzeti u obzir da jednom članu savjeta koji dolazi iz npr. Homara, Ivančića, treba da izdvoji svoje vrijeme i da bude u trošku pod uslovom da ima vlastiti autobomil da dođe na sjednicu savjeta mjesne zajednice, dok u nekim drugim mjesnim zajednicama takav član nema tih troškova. Znači, morat ćete ući pojedinačno u rješavanje ovih problema i ima načina da se to riješi. Biće tematska sjednica, pa počev od nas vijećnika koji ne zaradimo ovaj paušal, izuzev naknade koju danas imamo ja ne vjerujem da mi više zaradimo. Izuzetno respektujem i cijenim predsjednike savjeta mjesnih zajednica koji su na čelu prvi sa narodom. Kolega Besim kaže da politika pokreće neke stvari, ali ja mislim da je moć i novac motiv većini ljudi. Samim tim što bi mi neke stvari regulisali i umanjili, mislim da bi ljudi možda patriotski pristupili svemu ovome, kroz kandidiranje, politiku i manji motiv bi im bio novac. Znači, pojedinačno pristupiti problemu, razgovarati sa svakim predsjednikom savjeta mjesne zajednice.

MUHAMED HANDŽIĆ – vijećnik BPS-a

Trebamo donijeti zaključak kojim ćemo učiniti odgovornim sve one kojih se tiče za realizaciju ovoga što piše "odmah".

DAMIR FILIPOVIĆ – predsjedavajući

Dao je na glasanje prijedlog zaključka Muhameda Handžića i Općinsko vijeće Ilijaš je jednoglasno donijelo

ZAKLJUČAK

I

Zadužuju se svi nadležni po Prijedlogu Mjera za poboljšanje mjesnih zajednica Općine Ilijaš da realizuju predložene mjere sa rokom "odmah" najkasnije do Tematske sjednice u aprilu, te da naprave analizu realizacije istih zajedno sa Komisijom za poslove mjesnih zajednica i saradnju sa drugim općinama i gradovima Općinskog vijeća Ilijaš.

II

Zadužuje se Komisija za poslove mjesnih zajednica i saradnju sa drugim općinama i gradovima Općinskog vijeća Ilijaš da dostavi analizu realizacije predloženih mjera na Tematsku sjednicu u aprilu.

Na prijedlog predsjedavajućeg Općinsko vijeće je jednoglasno donijelo

ZAKLJUČAK

Zadužuju se Komisija za statut i propise Općinskog vijeća Ilijaš i Služba za opću upravu i lokalnu samoupravu Općine Ilijaš da pripreme unificirani prijedlog statuta mjesnih zajednica, te isti dostave savjetima mjesnih zajednica Općine Ilijaš, kako bi normativno uredili rad mjesnih zajednica.

Diskutanata po ovoj tački dnevnog reda više nije bilo, pa je Općinsko vijeće Ilijaš jednoglasno usvojilo

Mjere za poboljšanje rada mjesnih zajednica Općine Ilijaš

AD-15

Izveštaj o realizaciji Programa rada Općinskog vijeća Ilijaš za 2015. godinu

Diskutanata po ovoj tački dnevnog reda nije bilo, pa je Općinsko vijeće Ilijaš jednoglasno usvojilo

Izveštaj o realizaciji Programa rada Općinskog vijeća Ilijaš za 2015. godinu

AD-16

Izveštaj o rješavanju upravnih stvari u upravnom postupku

Diskutanata po ovoj tački dnevnog reda nije bilo, pa je Općinsko vijeće Ilijaš jednoglasno usvojilo

Izveštaj o rješavanju upravnih stvari u upravnom postupku

Zatim je predsjedavajući Općinskog vijeća Ilijaš Damir Filipović, zaključio 37. sjednicu OV-a u 13:20h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ

Damir Filipović, dipl.pravnik

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
Broj certifikata:20938

